




## চবিতে ছাত্রলীগের দুই গ্রুপে সংঘর্ষ, ২০ কক্ষ ভাঙচুর

প্রকাশ : ০১ মার্চ ২০১৯, ০০:০০ | প্রিন্ট সংস্করণ

 চবি সংবাদদাতা

তুচ্ছ ঘটনাকে কেন্দ্র করে চট্টগ্রাম বিশ্ববিদ্যালয় (চবি) ছাত্রলীগের দুই গ্রুপের মধ্যে সংঘর্ষের ঘটনা ঘটেছে। এতে উভয় পক্ষের আটজন কর্মী আহত হয়েছে। একটি মোটরসাইকেলে আগুন দেয়াসহ সোহরাওয়ার্দী হলের প্রায় ২০টি কক্ষ ভাঙচুর করা হয়েছে। গত বুধবার রাত থেকে গতকাল বৃহস্পতিবার বিকেল পর্যন্ত বিশ্ববিদ্যালয়ের সোহরাওয়ার্দী ও শাহ আমানত হলের সামনে দফায় দফায় এ সংঘর্ষের ঘটনা ঘটে। সংঘর্ষে জড়ানো গ্রুপ দুটি হলো বিশ্ববিদ্যালয় ছাত্রলীগের বগি ভিত্তিক সংগঠন বিজয় ও সিএফসি। দুটি গ্রুপই প্রয়াত সিটি মেয়র এ বি এম মহিউদ্দিন চৌধুরীর অনুসারী।

আহতরা হলেন, সিএফসি গ্রুপের শোয়েবুর রহমান কনক এবং রহমত উল্লাহ, বিজয় গ্রুপের মেহেদি হাসান, ওসমান, ইমরান হাসান, কাকন, আবু সান্তর ওমো. ফয়সাল।

প্রত্যক্ষদর্শীরা জানান, বুধবার রাতে আমানত হলের সমানে একটি দোকানে বসাকে কেন্দ্র করে বিজয় গ্রুপের কর্মী কাকনকে মারধর করে সিএফসি গ্রুপের কর্মীরা। এই ঘটনা বিজয় গ্রুপের কর্মীরা জানতে পেরে সোহরাওয়ার্দী হলের সামনে বিজয় গ্রুপের শোয়েবুর রহমান কনককে মারধর করে। পরে বিজয় গ্রুপের কর্মীরা সোহরাওয়ার্দী হলে এবং সিএফসি কর্মীরা শাহ আমানত হলে অবস্থান নিয়ে ইট পাটকেল নিক্ষেপ করতে থাকে। সংঘর্ষ চলাকালীন বিজয় গ্রুপের কর্মীরা সোহরাওয়ার্দী হলের সামনে সিএফসি গ্রুপের এক কর্মীর মোটরসাইকেলে আগুন ধরিয়ে দেয়। পুলিশ এসে পরিস্থিতি নিয়ন্ত্রণ করে।

গতকাল বিকাল পর্যন্ত সিএফসি গ্রুপের নেতাকর্মীরা সোহরাওয়ার্দী হলে বিজয় গ্রুপের কর্মীদের উপর হামলা করে। এসময় বিজয় কর্মীদের প্রায় ২০টি কক্ষ ভাঙচুর করে সিএফসি গ্রুপ। পরে পুলিশ পরিস্থিতি নিয়ন্ত্রণে আনে।

বিজয় গ্রুপের নেতা জাহেদুল আওয়াল বলেন, রাতের ঘটনা সমাধান হয়ে যাওয়ার পরে গতকাল আবার তারা আমাদের কর্মীদের ওপর অতর্কিত হামলা করে। সিএফসি নেতা রেজাউল হক রুবেল বলেন, ‘বিজয় গ্রুপের কর্মীরা ক্যাম্পাসে মাদকের বিস্তার করছিল। তাই আমাদের কর্মীরা তাদের প্রতিহত করে।

হাটহাজারী মডেল থানার ওসি বেলাল উদ্দিন জাহাঙ্গীর বলেন, ‘দোকানে বসাকে কেন্দ্র করে ছাত্রলীগের দুই গ্রুপের সংঘর্ষ হয়েছে। বর্তমানে পরিস্থিতি নিয়ন্ত্রণে রয়েছে।

ইত্তেফাক গ্রুপ অব পাবলিকেশন্স লিঃ-এর পক্ষে তারিন হোসেন কর্তৃক ৪০, কাওরান বাজার, ঢাকা-১২১৫ থেকে প্রকাশিত ও মুহিবুল আহসান কর্তৃক নিউ নেশন প্রিন্টিং প্রেস, কাজলারপাড়, ডেমরা রোড, ঢাকা-১২৩২ থেকে মুদ্রিত।